

Tourism department-i ayonga aliba senden nung kin pongu madentsü

Dimapur, Luroi/August 17 (TYO): Apex tribal bodies pongu den August 9, 2025 nü senden amendang sorkar senden aser sentong kecha nunga shilem magitsü pangzüng renema aliba ya tarutsü nung sangdong magütsü tashi kasa alitsü, ta Deobarnü 5 Tribes Committee on Review of Reservation Policy (5 Tribes CoRRP) sangdong ka ajanga ashi.

Iba pangzüng tang tashi aliyongji, apex tribal bodies pongu den parnok indang frontal organizations aser constituent units tem dang iba pangzüng sülen shidak anidaktsü aser pei aliba tesem nunga iba pangzüng mapa kuma

inyaktsü ajungshir, ta sangdong ajanga ashi.

Anungji Department of Tourism ajanga August 18, 2025 nü senden ayonga aliba nung kin pongu sanger shilem magitsü.

Nagaland Chief Secretary nem August 9, 2025 nü takhangba agüja aliba nung State sorkari telangzüba tajung ka magütsü tashi iba ama State sorkari state mesüra district level nung senden mesüra sentong ayongzükbä nunga kin pongu sanger madentsü, ta 5 Tribes CoRRP ajanga ashi.

Arok telemtetba wazüka ayuba nung ajaki angateta aser amalitep alitsü ayongzüker, ta sangdong ajangasa ashi.

NEET UG 2025 nung Vatsala Panghal nem State Quota magütsütsüla: NMSA

Dimapur, Luroi/August 17 (TYO): Naga Students' Federation (NSF) den Nagaland Medical Students' Association (NMSA) nokdaka lir aser NEET UG (MBBS/BDS) 2025 atema Nagaland State Quota kübok Vatsala Panghal indang candidature anema nokdaker, ta NMSA sangdong ka ajanga ashi.

Vatsala Panghal, shibai NEET UG 2025 Score: 455, All India Rank: 113803, Nagaland State Rank: Category III, S.No. 1 nguteta lir, lai tebu tang posting mechi address ya Kohima nung agüja lir, ajisüaka la teti aliba ki Haryana nung lir ta ajaki meteta lir.

La ya Nagaland nung 'bonafide resident' masü mesüra lisopur-a masü aser la ya State indang Scheduled Tribes kecha nungia masü. Anungji Nagaland indang State Quota nung la adenba ya kuli tejangja mali aser reservation policy nung aibelen lir, ta NMSA tir Pito S Rochill ajanga sangdong nung ashi.

Nagaland nung professional courses atema State Quota ya azü agi Naga nunger aser State nung lisopur asoshi kisüng wazüka ayuba lir, koba tang aliba temzüng-özüng aser policy kübok agütsür.

Haryana nung alir tejangja asünung, Panghal ya lar ki aliba state counseling process ajanga admission agütsüla. Khen atema arua aliba mesüra service posting tashi nung Nagaland indang State Quota agiba ya tongtipang policy mashi lenmang nung amshir ta

adoker, ta NMSA ajanga ashi.

State Quota tsütsü central pool nungi Nagaland asoshi MBBS menden kanga telatet (40-42 shi) dang angur. Ibai lisopur kaketshir temsüa alir nisung meyirijang aika asoshi meperir. Lisopur masür kati item menden agiba ajanga tejangja kuli bener züngner temeden aser maongka rakzüker asütsü.

Ibai application ka indang masü saka tangatetba aser inyaka aruba nung tasüngdangtsü aruba indang lir. Iba ama inyakyim mereprang yutsüba ajanga reservation framework tim masüba nung amshitsü kishi lapoktsütsü aser lendong aketba tatishitsü yutsütsü, koba ajanga Naga nunger lisopur temenden aser maongka samatsütsü, ta NMSA ajanga ashi.

Anungji NSF-i NEET UG 2025 atema Nagaland State Quota küboki Vatsala Panghal maitdaksütsü akhangba nung NMSA akang-akanga nokdaka lir.

Tarutsü nung technical mesüra professional courses nung lisopur masüba candidate temi tim masüba yimya nung State Quota magidaksütsü asoshi kanga junga aser tesashiba nung tendanga aser mittsü onokia akhanger.

Reservation policy meshi-meshia wazüka ayutsü aser Nagaland nung aliba lisopur shisaliok temeden kumzüka ayutsü asoshi ketdangsür temi iba ken o süoki ia tekeraba nung mera agütsü ajungshir, ta NMSA sangdong ajangasa ashi.

NFHRCC-i Naganimora Division nung Foothills Road semdang



NFHRCC-i Naganimora Division nung Foothills Road semdangba mapang tangokba noksa angur.

Dimapur, Luroi/August 17 (TYO): Department, contractor firm M/S Yanna Enterprise, Naganimora Unit president-i anir Konyak Union Unit, Naganimora Division nung yimtsüng pongu Council Chairmen aser lenirtem aser NFHRCC lungiemer August 16, 2025 nü Naganimora nung Foothills Road tang teyangludak aliba semdanga liasü.

Naganimora Division nung Foothills Road kanga junga

inyaka aoba atema yimtsüng pongu nungi Chairmen aser lenirtemi PWD (Road and Bridges) aser Contractor dang pelaba lemsatep aser NFHRCC dang Tizit nungi Khelma tashi Foothills Road tesendaktep takok angutsü asoshi temulung agüja inyaktsü ajungshi aser iba Project takok ngua metembang tashi Department den külemi mapa inyakba kanga junga meita reprangtsü aser ketdang asütsü

ajungshia liasü.

Parnokisa 2013 nungi anisüngzükbä makai iba mapa tajung asoshi bendanga agütsür inyaka aruba nung Committee maneni nungita yaritsü ashi.

Tang tashinung Naganimora Division nung inyaktsü aliba mapa shilem 30 dang renema lir, ajisüaka Contractor's firm ajanga joint inspection team dang November 2025 tashinung mapa renemtsü ta ashi.

Manipur Angh Ajay Kumar Bhalla-i Nagaland Angh inyaka atatsü

Guwahati, Luroi/August 17 (Agencies): Nagaland Angh La Ganesan asüba sülen Hoibarnü India Tir Droupadi Murmu-i Manipur Angh Ajay Kumar Bhalla nem Nagaland Angh mapa talila inyaktsü shimogo. Iba sangdong ya Rashtrapati Bhavan nungi Honibar nikongdang agütsü.

La Ganesan ya mapang talangka Tamil Nadu nung BJP lenir inyaka liasü aser Rashtriya Swayamsevak Sangh (RSS) nunga tongti shilem agia arur Hokulbarnü Chennai nung asü. Pa ita tetenzüklen Tamil Nadu nung par kidang alanga tekolak yirur ICU nung munga liasü.

Bhalla, shiba 2024 küm December ita Manipur Angh akum, pa taoba mapang India indang Union Home Secretary inyaka liasü. Manipur nung kin ana tsüngta mepetmesü adoker aliba mapang February 2025 nung President's Rule benoktsü

hopta ana dang lia pa Angh inyaktsü shim.

Manipur nung centre-i yimsü asüba ita trok atsülangtsü tawa Parliament-i agizük, anungji Bhalla ya administration nung tekolakba asütsü.

Bhalla-i Manipur nung mepetmesü adoka aliba Meitei aser Kuki-Zo kin tsüngta tangatetep kati arutsü asoshi ketdangsüa mapa balala inyaka arur.

Telok balala tsüngta azüdokshi tulubo ajemogo, ajisüaka kin ana tsüngta jembishinü ano metenzükleti lir aser anatsülen nungi lenirtemi jembishinü masür.

Bhalla lenisüba kübok state administration-i tongtipang maparen balala nung rangloka mepetmesü adoka aliba mapang auyaba prangbong meyiptsütsü ajungshi, kin balalai amokbanga aliba regions nung timtem majurui senzüsempongtsü asoshi

highways mokdanga aliba tanaben lapoktsü aser azüdokshi agi tesem balala nung jenshia aliba nüburtem meyipa shilangdaksüba nung yaria liasü.

Nok-nü meyipa agütsüba nung takok kangabo mali, highways lapokshitsü merangba ajanga asüdokshi tasen tenzükbä

Bhalla ya Angh meshimdang Union Home Secretary ka ama national security aser administrative tsütsü tongtipang mapa aika ketdangsüa inyaka liasü.

2019 nung Jammu and Kashmir indang special status agientsüba mapang Centre-i telangzüba agütsüba pai ketdangsüa liasü, Citizenship Amendment Act anema linük tesem ajungalen longkak aitiba ketdang asü aser sorkar indang chief nodal officer ama COVID-19 lockdown nunga ketdangsür mapa inyaka liasü.

ANCSU-i scholarship nodal cell amenoktsü anogo züngzükbä

Dimapur, Luroi/August 17 (TYO): Higher & Technical Education department kübok anogo 27 tsüngta scholarship nodal cell temeja ka amenoktsü asoshi All Nagaland College Students' Union (ANCSU) ajanga state Chief Secretary nem tezüluba nung takhangba ka agütsüogo.

Hokulbarnü iba tatembang takhangba agütsüba nung ANCSU-i taoba mapang November 19, 2024 nü sangdong agütsüba nenshia ashi aser Chief Secretary dang teküraba nung nüngdakba mera agütsü asüngdanga liasü.

Cabinet senden ka June 10, 2019 nung amendang Higher & Technical Education department kübok scholarship nodal cell temeja ka amenoktsü agizüka lir, ta ANCSU ajanga ashi.

Iba sülen October 25, 2019 nü scholarship nodal cell temeja amenoktsü sangdong agüja kaketshir nem teimla agütsü.

"Ajisüaka iba cell ta paper nung dang ashi mapa kuma inyakba mali. Department balala kübok prokshia aliba scholarship schemes tabu ajunga cell/board ka küboki maitdaksütetba ajanga state sorkar dak tashi maliba sayur," ta ashi.

"Danga NE states tem nung scholarships asoshi board/cell balaka lir aser Central Ministry nungi senotsü agütsüba memonui lemshitsür, saka Nagaland sorkari asaa iba tebilemstü tulu senzüka yutsüba ya kaketshir timtemba aser temeden tepsetba den sako lir," ta ANCSU ajanga ashi.

Iba cell amenokba menütsü kuli tejangja kecha mangur, kechiaser iba maparen Cabinet senden nung agizükogo, anungji anogo 27 tsüngta mapa kuma meinyakra, kaketshir temi democratic yimya nung longkak aittsü, ta ANCSU ajangasa ashi.

Kohima Phezoucha Colony nung 'Faith Dental Care Clinic' lapok



Lipoknungsang Jamir, Associate Pastor, KABAI lapoktsudang tangokba noksa angur.

Mokokchung, 17, Aug (TYO): Faith Dental Care Clinic ta sür ka NBCC Convention Centre aser Nagaland Information Commission anasa Phezoucha Colony, Kohima nung 15th Aug, 2025 nü Kohima Ao Baptist Arogo (KABA) Associate Pastor, Lipoknungsang Jamir-i

meshiteta sarasademmer lapoktsüogo. Pai iba sentong nung jembidang, dental clinic takok ngua lapoktetba asoshi kibur Dr. Rongsenmenla Pongen nem tenünsang agütsüba den iba clinic ya nüngdakbapurtem asoshi temoatsü tesem ka asütsü moaja metetdaksü.

Inderprastha Dental College and Hospital, Delhi NCR, Ghaziabad nungi graduate asüla Dr. Rongsenmenla-i sentong nung adener ajak dang pelaba lemsatepba den iba clinic-i teyari aginüa arur ajak nem service tajungtiba agüja aser timi anepalua anisüngzüük agütsütsü merangtsü, ta nangzüka ashi.

Kiyong nung nüngdaka aliba clinic ka lapoktetba den nübur nem service tajungtiba agütsütsü mulungtetba asoshi Dr. Rongsen aser par kibong dang pelar aser nübur tajangzüük asoshi inyakba mapa ajak nung nungita yariteptsü mulunga lir, Phezoucha Colony Chairman, Kelhoungunyu Vizo-i metetdaksü.

New Capital Baptist Church, Phezoucha, Pastor Bendang-i iba sentong takok ngudaksüba asoshi tenünsang agüja sarasademmer tembanga liasü.

Arunachal: Rajiv Gandhi University kaketshirtemi longkak ait

Itanagar, Luroi/August 17 (Agencies): Arunachal nung Doimukh nungi Kamki-i Rajiv Gandhi University's (RGU) Agriculture campus belener aotsü atema benokba anema kaketshirtemi nokdaker. Parnoki ashiba agi, parnok tebilemdangba mangadangi aser tesem tasenba atema sentong tapet meyanglui iba telemtetba agi.

Shiti ka ajanga kaketshir kati ashiba agi, iba jenjang ya kanga aritepa agi aser iba ajanga parnok shisaluyim raksatsütsü ta kaketshirtem aikati süoki ia bilemer.

Shiti nungsa, kaketshirtem telok kati tawa Aalo nung Kamba circle kübok Kamki nung amenoker aliba campus tasenba ya semdangogo, aser iba tesem nung basic amenities tema maliba ngua parnok aoksaba shia lir.

Iba tesem nung classroom, laboratory aser tajemtsü tsü

mesüra metsümeshidak amala dena mali. Kaketshir yagi ashiba agi, parnok nem mapa inyaka aliba academic environment ka agütsütsü melena ketdangsürtemi iba tesemi belener aotsüba-ang tali süoki ia bilemer ama angateter.

RGU agriculture kaketshirtemi parnok dang taah kanga tali meshir ta ashiba mapang ka nung tang iba university belener aotsü atema benokogo.

Shiti nungsa India kübok tanga central university tem den medemdangra iba university nung taah tali meshiba shisema lir.

B.Sc. (Agriculture) program atema RGU taahji sen 16,250 lir, koba Nagland University (Rs. 8,640) aser Visva-Bharati University (Rs. 8,745) dang nungi anasü agi timba aser Banaras Hindu University (Rs. 10,000) dang nungi 1.6 ben agi

timba lir.

M.Sc. (Agriculture) atema RGU-i sen 26,000 agir, koba Nagaland University (Rs. 10,460) dang nungi 2.5 ben agi timba aser Visva-Bharati University (Rs. 11,525) dang nungi tesadang aser Banaras Hindu University (Rs. 3,331) dang nungi tiben agi timba lir.

Arunachal Pradesh nung RGU kija central university lir asünung sensaker aser yimdak yimtsüng nungi aruba kaketshirtem atema fee structure ya temerenshi den kasa lir.

Rajiv Gandhi University Students' Union (RGUSU)-ia item kaketshirtem takhangba pusemogo aser university dang tesem tasenba nung infrastructure tapet yanglutsü, telemtetba balala agiba mapang kaketshirtem danga parnok tebilemba asüngdangtsü aser taah tali agiba ya asadangtsü takhangba agütsüogo.



Doordarshan Kendra, Kohima, Nagaland nungi Programme Head, Debabrata Goswami-i anir par telok Nofuzenla Aier (Broadcast Executive), Temjen Amer (Technical Assistant), aser Zayiel Pusa (Cameraman), parnoki Ao kin indang sentong (programme) tapu balala yanglutsü asoshi Ungma yim semdangba mapang tangokba noksa nung angur. Parnokisa ano tongtibang nisung kar ajurutsü aser kaket riju kar semdanga item indangjia sentong balala yanglua DD Nagaland nung sayutsü, ta osang ka ajanga metetdaksü. Doordarshan teloki SDO Civil, Tamsüchuba Jamir; District Cultural Officer, Imyaba Ao aser iba maparen nung yariteper ajak dang pelaba metetdaksü. Mokokchung, 16th August, 2025

NFHRCC-i asükhü lemsatep

Dimapur, Luroi/August 17 (TYO): Fraternity of the Nagaland Foothills Road Coordination Committee (NFHRCC)-i , Nagaland Angh La Ganesan Chennai nung asüba osang angazüka mang ayimba lemsatepogo.

Pa asüba ya Nagaland nung aliba nüburtem atema kanga takoksa tulu lir, kechiyong pa ya nüburtem Angh ka ama züngshia liasü.

NFHRCC-i mangyim jashi tia

nung aliba mapang asür kinungertem den asükhü lemsateper, ta kasa sangdong ajanga metetdaksü.

Tulusang Tsüngremi asür kinungertem nem anisüngzüük agüjang ta aser asür tanüla teti tatem makadak anisüngzükdakjang ta sarasademtsü, Convenor Supu Jamir aser General Secretary Chenithung Humtsoe nati külem sangdong ka ajanga metetdaksü.

Assam: Biswanath nung kibong 307 anina ali bigha 175 azüngtetogo

Guwahati, Luroi/August 17 (Agencies): Assam nung Biswanath district administration-i Deobarnü Nonke Japoriguri nung ali bigha 175 azüngtettsü atema ozüng alema ali atsünger alirtem aninogo.

Iba meita aoba sentong ya kibong 307 dak rangloker agi, shirnok iba tesem nung temzüng ozüng kübok temelaba shitak magi liya liasü. Ali azüngtetba inyakyim nung excavators 20, bulldozer 10 aser police personnel 1,000 temai shilem agia liasü. Iba sentong benoka inyakba nükjidongji kiojen balala takaratiba nung bensatsütsü aser ali azüngtettsütsü asoshi liasü.

Iba sentong benoka minyak tsüngda administration-i August 1 nü osang agütsüogo aser iba tesem nung alirtem dang pei talidak azüngtettsür aotsü tetuyuba agüja liasü. Kibong aikati tashi anga-a pei ki bener parnok indang ki osettem belener liasü.

Ajisüaka Balidubi amala tzüümsüng agi kanga timtemba tesem nungi küm aika tejakdang iba tesemi arua alirtemi parnoki küm 40-45 tejakdang jenjang dalang agi parnok aliba ali alizüka liasü ta ashir.

Ali azüngtetba sentong ya kanga küm danga sentong yanglur benoka inyakogo, koba inyakyim kecha tetsükdaksü

makai benoka inyaksü atema zone pezü küma lemsar inyaka liasü. Ketdangsürtemi ashiba agi, temzüng ozüng nung aibelen masütsü aser kecha mepetmesü madaoktsütsü atema rangloker iba inyakyim benoka inyaka liasü.

Sentong takok ngua benoka inyakogo, ajisüaka iba tesem nungi aninertem aika khen atema tejenokdak yanglur litepdar. Item kibongtem yagi rehabilitation aser parnok tanga tesem ka nung amenoka alitsü atema sorkar dang teyari meshidar. Parnoki ashiba agi, parnok iba tesem nung joko mapang talangka alir.

Sorkari ashiba agi, parnoki rehabilitation atema asadangdar, ajisüaka tang tashi nung sentong tejangja ka yanglur aliba lemsatepa mali.

Grazing reserves, arem aser tanga tekümsükba kübok tokja aliba nüburtem meyong alitem atsünger aliba azüngtettsü atema Assam sorkari tang jenjang agia aliba nung iba ya-a shilem ka lir. Administration-i iba amala ali temelaba makai atsüngba khenyongi magizüksü ta metetdaksüogo.

Inyakyim maneni benokyonga aoba mapang, alidak sendakba ozüngtem benoktsü atema ketdangsürtem tetsükdaksü adoker aser inyakyim agi kongshirtem tenüngdakba peritsütsü atema timtem ajangshia arudar.

Tezpur jail nung tepuokertem mapang talila puoka ayur

Guwahati, Luroi/August 17 (Agencies): Assam nung Sonitpur district kübok Tezpur Central Jail nung puoka aliba tepuoker trok parnok tepuokdak ayutsü atema atakzüksüba mapang tembanger sülena küm ana dak tali puoka yua lir.

Activist, Dilip Nath-i RTI ka benokba ajanga iba ken o ya temai adoka liasü. Pai Assam Angh Lakshman Acharya dang iba ken o ya takaratiba nung bentettsütsü takhangba agütsüogo.

Nath shiba criminal ken o ka nung July 17 nü nungi Tezpur Central Jail nung puoka yua lir, pai Turkey, Manash Dutta, Laljit Chauhan, aser Dipom Hazarika nung densema tepuokertem parnok nem atakzüksüba mapang tembanga tepuokdak aliba sülena maneni mechioki lir ta ashi.

Tepuokdak alirtemi ken o benokba dak ajemdaker Assam Human Rights Commission (AHRC)-ia ken o ka benokogo.

"Iba ya meimchir temeden anema inyaksangshiba ka lir.

Tepuokdak ketdangsürtemi inyakyim anema inyakogo," ta Nath-i ashi.

Iba tatalokba ajanga undertrial tepuoker Machang Lalung indang ken o bilemtetshidaksü, shiba 1951 küm Indian Penal Code Section 326 kübok aija apu aser o mebendangi küm 50 shi Guwahati jail nung puoka yur 2005 kümang chioka liasü.

Gauhati High Court advocate kati ashiba agi, "tepuoker ka mapang alia puoka ayutsü makok. Ajisüaka taküm tepeyong tepuokdak ayurtem, shirnok tenüngdakba kar meperitsü tashi mechioktsü ali iba amala ken o mesüra mental health laws dak sendakba nung puoka alirtem atemabo ken o ya balaka lir. Maneni appeal aser parole amala legal inyakyimtem ajanga tepuokertem chiooktsü atema menomeyangtsü akok."

Ken o dak sendakba nung Angh office aser Human Rights Commission nungi telangzüba atadar.

Delhi nung azü agientsü tuyuba anema Chennai nung longkak ait



New Delhi, August 17, 2025: Tawa Supreme Court-i Delhi-National Capital Region (NCR) nung ketdangsertem dang kibur maliba azü ajak pua dog shelters nung ayutsü tetuyuba agütsüba anema Amongnü azü meimertemi Ramlila Maidan nung longkak aitba noksa nung angur.

Chennai, August 17

(Agencies): Tawa Supreme Court-i Delhi-NCR nung kibur mali nemzüba azü ajak pua shelters nung puoktsü tetuyuba agütsüba anema Amongnü Chennai nunga shiruru meimertem aser shiruru temeden atema inyaktertemi longkak ait.

Anogo ishika jakdang Delhi nunga azü meimertemi Supreme Court tetuyuba anema longkak aita liasü.

Supreme Court-i ketdangsertem dang, hopta 8 tsüingda Delhi-NCR nung kibur maliba zü ajak shelters nung puokang, ta tuyua liasü.

August 11 aser 12 anogotem

nung New Delhi district nung azü meimertemi ketdangsertem dang nungi temelaba magii Supreme Court obendang anema longkak aitba atema Hokolbarnü Delhi Police-i FIR pezü benokogo.

Delhi Police-i, Independence Day atongsü jakdang security atema Bharatiya Nagarik Suraksha Sanhita (BNSS) kübok Arrla 163 nung ajemdaker tenokdangba benoka liasü, ajisüaka shiruru meimertemi tashi mangai longkak ait, ta metetdaksü.

Police-i longkak aiterterem senshidaktsütsü merangba ajanga tesem kar nungbo police aser longkak aiterterem tsüingda

rara adoka liasü.

"Longkak aitba tesem toktsütsü memelungertem kar apu. Ozüing alema inyaker ajak nem temerenshi agütsütsü," ta Delhi Police-i metetdaksü.

World Health Organisation data nung ajemdaker sorkar tenüing nung ken o jembir Solicitor General-i, 2024 küm azüi angoba tatalokba lakh 37 liasü, rabies tashidak agi nisung 305 asü aser asürtemji teimbaka arrshi küm 15 ser tekübokpurtem liasü, ta metetdaksü.

Paisa, "Azütemji tepsettsü masü saka nisung nungi pilaa ayutsüla. Tsüraburtemi tanurtem kimai meyoker. Shiruru sempar shinga mali," ta ashi.

Bihar nung 'Vote Adhikar Yatra' tenzükögo

New Delhi, August 17

(Agencies): Amongnü Bihar kübok Sasaram nung Congress lenir Rahul Gandhi-i 'Voter Adhikar Yatra' tenzüksüogo; anogo 16 tsüingda parnoki kilometer 1,000 dak tali jaja district 20 dak tali ayimjemtsü.

Bihar nung Election Commission-i benokba Special Intensive Revision (SIR) ya vote ayatsü atema lir, ta tai tonglokja iba yatra ayongzü.

Amongnü Sasaram nung tenzükba yatra ya September 1 nü state yimtiba, Patna nung lokti senden tulu ka agia tembangtsü.

Patna nung RJD tongti Lalu Prasad Yadav aser par jabaso Tejashwi Yadav nata iba yatra tenzükba sentong nungji aden.

Rahul Gandhi-i X ajanga, "Anogo 16, Districts 20+, kilometer 1,300+. Voter Adhikar Yatra den onok nüburtem dangi arur. Iba rara ya democratic temeden - 'nisung ka, vote ka' atema lir. Linük temzüing kümzüksü atema Bihar nung onok den shilem agiang," ta metetdaksü.

Congress MP Jairam Ramesh-i, "Voter Adhikar Yatra ya yimtenren jajaba ka dang masü saka linük temzüing crusade ka lir. Iba ya asen democracy, 'nisung ka, vote ka' akhümket kümzüksü aser tashi alirtemi ashikülak ajanga sensakertem aser meshimejungertem ola nembangtsüba mesüra ashioktsüba nokdangtsü atema

lir," ta metetdaksü.

Iba yatra ya Aurangabad, Gaya, Nalanda, Sheikhpura, Munger, Bhagalpur, Purnea, Darbhanga, Sitamarhi, Champaran, Siwan, Chapra aser Arrah adena agiba sülen tesüsa state yimtiba, Patna nung tembangtsü.

Yatra tenzükba sentong nungji Rahul Gandhi-i Congress Tir Mallikarjun Kharge aser Rashtriya Janata Dal (RJD) tongti, Lalu Prasad na nem tzu anganüa agütsü. Ibaji dang masü iba sentong nung pai tama jembia liasü.

Lokti sentongtem nung teti agia tongti o jembiri tesüsabuba jembir, ajisüaka Kharge aser Lalu Prasad na jakdang pai tama jembia liasü.



August 17, 2025 nü New Delhi nung Dwarka Expressway aser Urban Extension Road-II (UER-II) semzükba sentong nung Ato kilonser Narendra Modi, Union Minister Nitin Gadkari, Delhi Chief Minister Rekha Gupta aser Haryana Chief Minister Nayab Saini nunger tangokba noksa nung angur.

EC-i electoral draft roll nungi agienba tenüing lakh 65 sangdong

New Delhi, Luroi/August 17

(Agencies): Supreme Court-i tuyuba ama Amongnü Election Commission-i Bihar electoral draft roll nungi agienba tenüing lakh 65 sangdongogo.

Electoral roll nungi agienba tenüingtemji district magistrates' websites nung upload sütsüogo, ta Chief Election Commissioner, Gyanesh Kumar-i metetdaksü.

Amongnü Election Commission-i ayongzükba osangbenertem senden nungji Election Commissioner ana-Sukhbir Singh Sandhu aser Vivek Joshi nata liasü.

Congress leniba nung opposition-i, Bihar nung electoral roll atema special intensive revision (SIR) agiba ya vote ayatsü atema lir, ta aitsür.

Kumar-i, "Election Commission-i anemertem mesüra pusemertem mali. Yimtemren party ajak kasa dang züingshir," ta metetdaksü.

Gyanesh Kumar-i, "Ozüing kübok yimtenren party ajakji Election Commission den registration agia dang tenzüker. Anungji kechiba Election Commission-i item party tem tsüingda bendangshidanga züingshitsü? EC atema ruling mesüra opposition kecha mali; ajak kasa dang züingshir," ta metetdaksü.

Paisa, "Tesüiba küm 20 tashi party ajaki electoral rolls metongshitsü atema jembia arur, aser iba takhangbaji ataloktsütsü atema EC-i Bihar nungi Special Intensive Revision (SIR) ya

tenzüker," ta metetdaksü.

"SIR inyakyim kübok voters ajak den party balalai shimba Booth Level Agents (BLAs) lakh 1.6-i longjemmer draft roll renem," ta pai metetdaksü.

"Iba nungji ajemdaker voters ajak, yimtenren party ajak aser BLOs-i longjemmer inyakyim teladak süa inyaker," ta pai metetdaksü.

"Anogo ishika tejaklen osangbenertem dang voters aika noksa sayu, aser ibaji parnok dang nungi temelaba magii inyaker. Parnok nem tai tongloktsü aser parnok amshi. Election Commission-i voters tetsürtem aser jalatem densema CCTV noksa sayutsü asü? Voter list nung alirtemi dang parnoki shimba candidates nem vote agütsütetsü," ta pai ashi.

Bihar nung special intensive revision (SIR) anema benoka aliba ken o taoba hopta angadanga mapang nung Supreme Court-i Election Commission dang voter list nungi agienba tenüingtem aser kulitem sangdongang, ta tuyua liasü.

Iba dak sendakba nung Amongnü Kumar-i, "Temaba court-i tetuyuba agütsüba sülen onoki ghonda 56 tsüingda draft electoral roll nung mezüingokba tenüingtemji district websites nung sangdongango," ta metetdaksü.

SIR exercise pusema Kumar-i, yimtenren party kari iba inyakyim dak sendakba nung osang tai prokba ya tebilemtsü tuluka lir, ta ashi.

J&K kübok Kathua nung anentsüh lendong nung nisung 7 asü

New Delhi, August 17

(Agencies): Honibar ayaterm nung Jammu & Kashmir kübok Kathua district nung tzüinglu sashia arua ajungben tzümetsüing aluba aser anentsüh lendong nung nisung tenet asü aser aika yiruogo, ta ketdangsertemi metetdaksü.

Kathua district kübok Jodh Ghati yimdak tzümetsüing aser anentsüh lendong nung gari lenmang aika ponger ao aser kiojen aika raksa.

Kathua kübok tesem balala nung anentsüh lendong nung nisung tenet asü; nisung pongu Jodh Ghati yimdak asü aser nisung ana Janglote nung asü.

Jammu Divisional

Commissioner Ramesh Kumar-i, "Yasüing nungi Kathua nung tzüinglu sashia aru. Anentsüh lendong nung nisung tenet süogo. Kümzükba maparen maneni inyakdar. Anentsüh lendong nung asürtem tasüing nguogo aser samaba nisungtem jana agi rembanga alitsü südi, ta bilema kümzükba maparen inyakdar," ta metetdaksü.

Tzümetsüing aser anentsüh aluba ajanga Jodh Ghati yim den sendaktepba lenmang raksaba den külemi alu nung aonsotsü jenti raksatsüogo. Iba yim den sendaktepba lenmang ajak ponger ao aser apu ka chirep.

Anava Hospital, Mokokchung nung UROLOGY CAMP alitsü

Visiting Consultant ji:

Dr. J Gnanaraj

(Urologist & General Surgeon)

Anogo : August 22-23, 2025

Contact : 6909534343 / 6909533287

Metetpelanüra agüja aliba number ajanga August 21 anogo tashi nung mesüra iba anogo matongdangsa tongtepratepang.

(Poktsütem dak sendakba timtem balala, tezüingjang nung lung aser natzü dak sendakba timtem alirtem asoshi)



TIR YIMYIM YIMOBILEM (EDITORIAL)

DIMAPUR MONDAY, AUGUST (LUROI) 18, 2025

Football ya temeranger meyong!

European aser America nung asojen agi memenep agi parnok den toktepa asayatsüsa jenjang metongteter dang ashi, Naga nungertemi kanga jangraba asayaji, saisapong tapu aika liaka, football ya lir. Naga nungersa süaka, ashiko, football asaya tenzükba ya Aortemi tama America nung missionary-temi lapokba school nung asaya tenzük asütsüa akok ta bilemer. Aji oda, alimai metettsüsa India tenüng nung Olympic nung football asayatsüba purtem Aor chanu katiang anir aotsüsa akümbaji Tsüngremi Dr.Talimeren nem dang masü saka Naga nungertem rongnunga Aor nem tama agütsüba maongka tuluka lir. Atangji, alimai India-bo alemli nungi meteta liasü saka football ajanga Naga nung metettsüsa Ao kin-ang shimtetbaji asenoki tamadoktsüla masü, ibaji maongka tulu saka ano tangari imlaba ama maneni lia aotsüba khureta dena lir. Aji oda, tanü Nagaland nunga football asayamong tulutibaji Dr.T.Ao naroküm nung asayar süra, iba kisüng jagi Aor atur aser tangari imlaba ama asenok alitsü nüngdaker. Atangji, Dr.T. Ao asayamong nungbo Mokochung district mesüra Aor teloki dang akoktsüla ta masü saka tajungtiba teloki akoktsü, ajisüaka Aor teinyaktsüji Dr.T.Ao ajanga Tsüngremi agütsüba temoatsü aser maongkaji senmang kuma Ao lima ya nüngtugu football asayar adokba lima ka kumdaktsütsüsa asenok rongnung ajungshitepa inyaktsubaji kanga tongtibang teinyaktsü mapa ka kumogo. Tangbo tesusatsüka, tangaribo Dr.T.Ao tenüngji tsüngrem ama bilema tetshir aser pa tenüng nung asayadak tesem tulu tajung yanglua pa nem akhüm agütsür, ajisüaka Nagaland nungbo tang tashi Dr.T.Ao tenüng nung asayamong ka ayongzüka asayaba dak alaka pa mapa dak alang asenoki kecha inyaka maka. Aji oda, tangartemji yutsür Mokochung district nung danga tang yabo Dr.T.Ao tenüng nung football asayadak tajung ka yanglur yangji pa taküm ali ama reprangtsüsa pa indang kürakyanglu tulu aser talangka yanglur kanütsüka bilemer. Ajisüaka, asenok ya Dr.T.Ao ama masü, mapa kecha nunga tejok majet, anungji football asayamong alidang football benjong amonger ama kanga jangrabangraa amongtsü saka asayamong tatem den külemi asayartema aser tereprangertema football-a kena memetsü dang amato kumadoker. Iba denji kasa, asenok state government nunga 'Sports policy' tajung ka lateta yur, iba nemji anidaktsür masü saka asayadak stadium dena merenemtet ser anenba 'Sports policy' nem asenok anidaktsür. Iba jagi asenok state nung, tang amaji artepa Dr.T.Ao Inter district tourmanent tulu ayongzüka akar saka item asayartem rongnungji football asayabaji taküm nung mapa kuma asayatsüsa among atena mouteter. Iba nungji asenok asaya reprangertem aser asayartem ajaki kanga temulung agüja bilemdangtsüla. Atangji, alima nung football asayaba agi nüngtugu aser takar akümtsüsa asayatetertem ya kibong tajung chir asayadak 'ground' tajung nung asayaa aruba purtem masü saka timtemba kibongtem nungi yimdong nung tangar meyong ball metsüshia intetterte m lir. Aji oda, football yabo temang kanga anibelega asayatsüba asaya ka lir, anungji timtem maginer aser anibelega maremertemibo football masayatettsü. Ashiko, tanü asenoki football junga masayatetbaji ground tajung makaba dak tongloksütsüa akok, saka tetenzük nungi anibelega kanga magii ground tajung nung dang asayartemi tangar ground tamajung nung ball asayabaji pei mapa kümer asayartem makoktsü. Ibaji asenoki kodang jungjunga bilemdangdir, Mokochung town kisüng nung football ground tajung ka akaba agi Aor chanu rongnung football asayar tajung adoktsü ta masü, kechiyong shibai metet, Aor chanu football nung nüngtugu kuma asayatsüsa adoktsübaji Mokochung town atena orr aliba yimtsüng tilaba nungiang adoktsüa akok. Ibaji mamadoki, asenoki ground tajung yanglutsü nüngdakba indang jembidang asayar tajung adokdaksütsübajibo ground tajung nungi masü saka ground tamajung nung tsüngsema masem tetsüng tesa taküma bendanga agüja football asaya agi pei mapa kümer asayartem nungi adoker, kechiyong football yabo temeranger meyong asaya ka lir.

OLEMSABANG

Arogo kaji terenlok mapa nung ainba jagi teperi asü ?

~ L. Kika Pongener.

Tanü asen lima nung lim arogotem teimba ka terenlok mapa (Developments & Infrastructures) nung kanga renloka aoba angur. Talisa, town arogo tulutem balaka tanü putu nung alima tejakleni aoba den lirumedema kanga renloka aoba angur. Tenla-ki RCC Building tulu marble aser senti rongsen agi menokbanga, air condition sen crore aika endoka yanglur, arogo Office sen lakh aika endoka yanglur, Quest house sen lakh aika endoka yanglur, Staff quarter sen lakh aika endoka yanglur, Meeting Hall sen lakh aika endoka yanglur, arogo Gari (Vehicle) sen lakh aika jenjang 'Luxury Car' amshir. Arogo meyong School, College, Hostel, Rented House etc. yanglua lir aser kimong-lumong tulu aika alidena yua lir. Jila tulu nung aliba arogo tulutem nungbo toklang tenzükertem (Staffs) nem sorkar mapa nung tenzükertem den küsa itasen tulu (Handsome Salary) agütsür aser ano nungdakba teyaritem (Facilities) balala peria agütsür. Ano yimtsüngtem nung aliba arogo tulutema aika tanü putu nung akaba jangradema alitsüba nungdakbatem (Modern Facilities) ajak abensaa yua, renloka tejakleni aoba angur. Jila tulu nung aliba arogo tulu karbo ita nung tershilem tenla sen crore menden dak tema aruba rongsenketzüng nung kanga tashitait arogotem lir. Ajisuaka, kanga tesusatsü kaji....Arogo aika terenlok mapa nung renlokba amaji tanela jenjang (Spiritual) nungbo merenlokba aser mainba angudang kanga sasar.

Surabangla, arogo ka ainbaji....Terenlok mapatem inyakba 'Developments & Infractures' nung kanga renloka aoba dangji arogo ainba ta ajatsü asü (?) Arogo rongsen sen lakh/crore aika akaba dang arogo ainba ta ajatsü asü (?) Arogo nung toklang tenzükertem (Staffs) aika ayuba dang arogo ainba ta ajatsü asü (?) Arogopur nutsüng/züngsem noklang/merijang aika renlokba dang arogo ainba ta ajatsü asü (?) Arogo temang, telungzü, tasazük (Area) tulu asüba dang arogo ainba ta ajatsü asü (?) Arogo kimong-lumong tulu/aika alia akaba dang arogo ainba ta ajatsü asü (?) Arogo meyong school/college/ hostel/paying quest/rented house aika lapoka akaba dang arogo ainba ta ajatsü asü (?) Benjong-bentsü, longso-longben, chidiyungdi nung arogo rongsen aika endokba dang arogo ainba ta ajatsü asü (?) Arogo nung tongtipang anogotem balala nung, arogopur ajunga ataa senpet-lep alemba nung senotsü aika endokba dang arogo ainba ta ajatsü asü (?) Aji oda, iba amala dangjipo shitakba arogo ka ainba ta majatsü sudi ta bilemer. Hau-niii....alima asünungji item ajakji nungdakbatem lir....Saka rongsen peria kar ta ser kangabo menungdakba mapa (Projects) -tem nung arogo rongsen lalushiponga meintoktsüla.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Seoul nung Korean Christian history & culture center semzük



August 12, 2025 nü South Korea yimtiba, Seoul nung Korean Christian History & Culture Center semzükdang tangokba noksa nung angur.

Seoul, August 17, 2025 (Agencies): Korea nung Protestant missions sülen küm 140 ajungba nüngtem nung August 12, 2025 nü South Korea yimtiba, Seoul kübok Eunpyeong District nung Korean Christian History & Culture Center semzüko.

Iba Center ya won sen billion 10 (dollar sen million 7.2) indoka asü. Iba Center nung Permanent exhibition hall ka lir aser ki tamentep tanabuba nung special exhibition takdang, multipurpose hall ka, reading room ka aser archives lir. Iba takdang nungji 1906 küm missionary Rosetta Hall nungi anguba postcard ka, The Korea Mission Field journal, Namgung Eok-i yangluba hibiscus embroidery map ka aser James S. Gale-i meyipzükbä Tasen Lai ka densema lir. Iba dak alia Korean Arogo puti otsü kaketterem, mission mapa, democratization movements, tamang aser sobaliba ainba indang kaketterem lir.

Permanent exhibition 'Moments When Faith Was Beautiful' nung akhidang missionary tem mapang nungi tenzüka 2000 küm tashi nung Khristantemi inyakba mission mapatem indang putipuyang lir. Iba center nungsa

humanities programs, academic seminar, docent training aser Christian museum network amenoktsü sentong lir.

Iba Center semzükbä sentong nung jembidang foundation chairman aser Yoido Full Gospel Church nungi Rev. Young Hoon Lee-i Tenüngsang Ken 78:4 nung ajemdaker 'Tsüngremi inyakba' onük jembia liasü.

Rev. Lee-i, iba Center lapokba ajanga Korea nunger Khristantemi puti otsü junga angatettsü aser Tsüngremi melungba ataloktsütsü imlar, ta metetdaksü.

"Iba Center ajanga Korea-i Khristantem den longjemer amalitepba inyakba ajanga tejakleni aotsü ni sarasademtsür," ta pai metetdaksü.

Kasa sentong nung jembidang Center Director, Jae Sung Ahn-i, iba Center-i Khristan masüba nisungtem densema ajak pelashishia agizütsü, ta metetdaksü.

Iba Center ya Korea Arogo putiotsü metetdaksütsü aser Arogoi loktiliba den longjemer amalitepa tenzükbä mapa inyaksü, ta Ahn-i metetdaksü.

United Christian Churches of Korea Tir, Rev. Jong Hyuk Kim-i, Khristan museums aikati

akhidang mission inyakba nung rangloker, ajisüaka tang tasen lapokba Center yagibo akhidang Aso 19buba mapang puti otsü nungi tanü tashi otsü nung rangloker, ta ashi.

Seoul nung Mayor, Oh Se Hoon-i, taküm Korean missions küm 140 ajungba atema tenüngsang agütsüba den külemi Khristan yimsü ajanga Korea nung mozü aser nüburtem taküm jenjang ajungkettsütsü atema tamendakdak yanglutsü, ta metetdaksü.

Mayor-i, "Tanü iba kiojen semzükbä ajanga tarutsü putu lanurtemi akhidang putiotsü metettsü aser sensotem atema tesangwa aser metsü ama Khristantemi shilem maneni agitsü, ta ni amanger," ta metetdaksü.

Eunpyeong District Mayor, Kim Mi Kyung-i, Korea terenlok nung Khristan yimsü ajanga shilem tajung agiogo; iba Center ya tesüba mapang, tanü aser tarutsü sendakteptsü atema sabang ka asütsü imlar, ta metetdaksü.

Iba sentong tembanga lenirtemi ribbon mejep, iba sülen Seoul Arogo nung tongti pastor aser foundation board nung züngsem, Rev. Dal Ik Son-i süngdong ka temja liasü.

Maharashtra nung Hindu nunger telok kati Pastor ka dak azük

August 17, 2025: Maharashtra nung Hindu nunger telok kati, pastor kati Kibuba benjung nung azü lema agütsü, ta tai tonglokja azük, ta osang ka ajanga metetdaksü.

Hindu nungertem jagisa social media nung iba indang video ka lemsatapa liasü.

Taoba ita Maharashtra nung Hindu nunger telok ka Solapur nung aliba Tenla ki kati aoba sülen Kibuba benjung nung amshiba yi ashishia liasü.

Pastor-i parnok dang Kibuba benjung nung amshiba yiji tsükmenatzü juice lir ta ashi, ajisüaka Hindu nungertem jagi ibaji azü lir, ta aitsüba den külemi pa dang pastor license sayuang ta tuyua liasü.

Iba sülen parnoki

tsükmenatsü juice ji rakzüker aser pa dak azük.

Khristan melungtet telok Open Doors-i ashiba agi, Hindu nungertem jagi, pastor jagi nisung 20 nungi 25 adenshidaksüba sülen parnok nem yi temerem agütsü ta tai tongloktsü.

Pastor jagi tangartem Khristan yimsü dangi meyipdaksütsü atema mesüzüker, ta Hindu nungertem jagi pa nem tai tongloktsü.

Hindu nungertem jagisa social media ajanga, "Iba Arogo jagi tetsür tamangertem nem kangshia yi temerem agütsür, aser parnok mesepdaksüba sülen mapa tamajung benshir," ta metetdaksü.

Open Doors local partner kati, "Hindu yimsü alia amangertemi

parnok tebilemba ataloktsü aser Khristantem tsübudaksütsü atema tiyazü nung tai tongloktsür," ta metetdaksü.

Laisa, "Tawa Maharashtra nung Tenla kidang tekülem sentong tagidak mapang nung timtem agütsüba kanga bulua kümдар. Hindutva-i aniba state sorkar aser Hindutva extremist teloktemi state nung anti-conversion ozüng tasen ka benoktsü meranger," ta metetdaksü.

"Hindutva yimtenren lenirtem aikati tesempa o jembir aser Khristantemi tangartem yimsü meipdaksür ta tai tongloktsür. Hindu yimsü alia amangertemi Tenla kitem aser pastor tem anema maneni inyaker," ta laisa metetdaksü.

ANOGO ABEN TSÜNGREM DEN

Tamang Katet Tenangzükbä

"Kechiaser Tsüngrem tenangzükbätem kwisa lidir ajak Khrista dak au ta lir."
(2 Korint 1 :20)

Aiben asenoki asen tenangzükbä koda atalokdaksütsü meshisadangi nangzüker. 2 Korint 1:20 nung Tsüngrem tenangzükbätem kodanga memelenshir ta bilemtetdaksür.

Kechiba asenoki asen tenangzükbätem raksar ? Ibaji mazüoktetba ajanga asutsü anungji memelenshir. Tsüngrem memelenshir, anungji Pa tenangzükbätema memelenshir.

Tsüngrem tenangzükbätem tiyongtsüji Khrista lir. Tsüngrem tenangzübatem techir den teti tatem makai sendaka lir. Iba yagi Tsüngrem tenangzükbätem bushitsü Khrista dangi aotsü ajungshir. Techiri Tsüngrem tenangzükbätem atalokdaksütsü. Khrista shia nem bilemtetdaksür. Khrista shia aruba ajanga aser asütsü makokba ajanga pa dak tenangzükbä ajak Amen ta lir.

Sarasadem tatem nung Amen ta ashiba jagi kechisa shiogo ajak shitak ta amangba kuli sayur. Tsüngrem tenangzükbätem züludentsü tamakoktsü, saka ne tenangzükbätem zülur tenzüksü akok. Abrahami küm aika Tsüngrem tenangzükbätem ataloktsü ataa ali. Pa tamang kodanga marakzüi ali. Naia yamaji Tsüngremer mapang atatsü akok. Anogo shia pa temoatsü tenangzükbä nung liang.

Kohima Liangmai Baptist Church-i Family day of Prayer among



August 17, 2025 nü Kohima Liangmai Baptist Church 'Family day of Prayer' sentong nung Pastor, Rev. N. Silubo Zeliang-i Tsüngrem O jembidang tangokba noksa nung angur.

Kohima, August 17 (TYO): kibong ka nung tanurtem August 17, 2025 nü Kohima Liangmai Baptist Church-i kinüngbu teinyaksü shilem lemsatep.

Tsüngrem taochi aser Khristan kibong ka nung temoatsütem atema tenüngsang temeim, tenzükbä aser tongteprateppi kanga tongtibang, ibaji ajanga kibong kaji tejenokdak, taneptsü angudak aser tanela jenjang ainba tesem ka südaksütet, ta pai metetdaksü.

'Family day of Prayer' sentong ya Rutmakbo leniba nung agi aser youth department nungi lanurtemi ken ka aten.

Family day of prayer sentong tembangba sülen Dr. Amankhai aser lar adianutemi lokti chiyungdakja liasü.

Paisa, "Kibong kaji Tsüngrem temeim angateta Laishiba tesayubatem nung ajemdaker yangertsüla. Khristaji tekolak südaksütsüla," ta ashi.

Paisa, Tsüngrem tsübuba

AO OSHI ANGAZÜKDAK:**TANÜ ANGAZÜKTSÜBA OJANG****Teshitet**

(n) balaka shimteta ayuba (selected)

* Mungdangi teshitet nisung ana yok.

Tesola

(adj) temo aketba chiyongtsü (fatty ,oily in taste)

Chiyongtsü tesola ya temang atemabo majung.

OLONG PAITEP # 7243

1				2				3		4
5		6								
							7			
8										
										9
		10				11				
				12				13		
14										
						15				
16										

TIPIEN

2. Auonungchiyongtsü asenba

-(7)

5. Mangyimba mapang

-(5)

7. O tamendakdak

-(4)

8. Pei dak malangba

-(7)

10. Juli

-(7)

12. Sen ayudak

-(7)

14. Tenük agi ajitet

-(4)

15. Tamajung aküm

-(5)

16. Apuso

-(7)

LANGTSÜNGLEN

1. Lenmang

-(7)

2. Aor kidong ka tenüing

-(6)

3. Tenarong maten

-(6)

4. A _ _ _ g

-(3)

6. Mopung apodoka

-(3)

ola adokdaksüba

-(3)

9. Tongtipang tagitsü

-(7)

10. Menungra bilem

-(6)

11. Aiür

-(6)

13. S _ _ _ k

-(3)

14. T _ _ _ r

-(3)

OLONG PAITEP # 7242 TELANGZÜBA**TIPIEN :**

1. Tesangra, 5. Mungo, 7. Kisen,

8. Salem, 12. Semki, 14. Kilem,

15. Kensü, 16. Sangpang.

LANGTSÜNGLEN :

1. Temesen, 2. Raksa, 3. Aon,

4. Aso, 6. Nile, 9. Alizüng,

10. Omen, 11. Lemta, 13. Ola,

14. Kin.

**ALOKBA TZÜ NUNG TSÜSENER :****Pastor** : Alokba, ne molungjang ajunga agi aser tanüla nung tsüsener südi?**Alokba** : Au !**Pastor** : Süra na tain akümdang lokti nung tenzükra ochi shia tenzüksü südi?**Alokba** : Au !**Pastor** : Na sokar mapa ngua ao nungbo sorkar sen adjustment masütsüsüdi?**Alokba** : Au !**Pastor** : Na Arogo tenzüker ka kümra Arogo auditor memangmangdaksütsü südi?**Alokba** : Au !**Pastor** : Na Telok kar nung rank tolu ngua ora aji bazar nung mamshitsüsüdi ?**Alokba** : Au !**Pastor** : Na lenir ka kuma ora Tangar majung mejembitsüsüdi ?**Alokba** : Au !**Pastor** : Na yimsüsür ka kümra tulusaser takar ki sema onüba yimsüsür ka dangbo masütsüsüdi ?**Alokba** : Au !**Pastor** : Alokba, na kenü Sadi kuli agia kibong kuma ora merükmerüka Sadi süangmano !**Alokba** : Pastorba, ajibo mapangi Kechi bener arutsüdir to !**Pastor** : O Alokba !!!

Lilir: I. Kilang Ajem, Indisen, Dimapur.

Shillong airport atsülangtsü atema ali alizükogo**Shillong, Luroi/August 17****(Agencies):** Meghalaya kübok Umroi nung amenoka aliba Shillong Airport atsülangshitsü atema mapang talangka nungi yongya atar iba inyakyim ya asangsang akümtsü ana nung lir.

Airport nung runway 1,829 meter aliba ya 2,400 meter tashi atsülangtsü atema Meghalaya sorkari ali alizükogo. Iba jenjang agiba sülen Airbus amala tayimtsü tulutem dena anentettsü.

Runway yanglu yakata tenzüksü. Chief Minister Conrad K. Sangma-i iba osang ya Independence Day amungba mapang metetdaksü aser ashiba agi, iba runway

atsülangba ajanga passenger tem aser tayimtsü ajanga khu timtem bentettsü asoshi Shillong aser Northeast nem lenmang lapoktsütsü.

Airport yanglushiba sülen tayimtsü tulutem senzütsü atema lenmang lapoktsütsü.

Sangma-isa, Meghalaya nung longrenlongpang agi sünger aser tzünglu kanga aruba ajanga tetsükdaksü aika ajangshia infrastructure terenlok atema state bendanga agütsür aliba metetdaksü.

"Longrenlongpa asüba aser tzünglu kanga aruba ajanga lenmangtem aiben aponger oatoker aser lenmang yanglutsü atema sena timba intoker. Item tetsükdaksütem liaka

lisopurtem nem lenmang tajung agütsütsü atema onok bendanga agütsür lir," ta Sangma-i ashi.

Item tetsükdaksütem liaka state nung taoba küm ter tsüngda lenmang km 10,000 dak tajemba aliba nungi tangbo km 14,000 dak tema kümogo, koba ajanga yimtsüng 280 sendakteptsüogo aser iba den bendenloksema ano apua aika yangluogo.

Iba terenlok asoshi centre sorkari teyari balala agüja arudar aser Sangma-i, Mawlyngkhung nungi Silchar tashi high-speed corridor aser 29 km Tura bypass amala tongtibang project tem agizükba atema Ato Kilonser Narendra Modi dang pelaba lemsatepa liasü.

Manipur nung PLA züngsem ka apu**Imphal, Luroi/August 17****(Agencies):** Manipur police aser central security forces tem longjemer People's Liberation Army (PLA) indang armed wing Revolutionary People's Front (RPF) züngsem ka Honibarnü puogo, ta ketdangsürtemi Deobarnü metetdaksü.

Itangitertem nungi osang tejangja angazükba sülen tesem

balala longbanga yur meita aoba mapang iba nisungba ya pua liasü.

Telungpursang ya rakzükrakdemba aser tanga ozang alema inyaksangshiba maparen balala nung densema liasü aser pa ya Imphal West district kübok Patsoi nung par kidang pua liasü.

Aija alisang ya Mayengbam Jibon Singh (51) ta jangjaogo.

Police-i ashiba agi, Singh yagi dokan, shishilembaba balala aser nüburtem dang nungi rakzükrakdema liasü.

Pa apuba mapang mobile handset ka aser Aadhaar card ka pa ket nungi nguteta liasü.

Temzüng ozüng kübok arrla tapet dak ajemdaker pa anema Patsoi Police Station nung ken o ka benokogo aser ken o maneni bushisüngdangdar.

Tinsukia nung lisopur tetsür ka dak teka sangshiba anema longkak ait**Guwahti, Luroi/August 17****(Agencies):** Assam nung Tinsukia district kübok TDA market nung SB Mobile nung inyaker arishi küm 22 tain lisopur Assamese tsür kati la dak kibur Mohammed Aquram-i pa indang dokan nung customer tem matsüngdang la dak ta maoktsü ta ashi.

Tetsürla ya Bornali Borpatra Gohain ta jangjaogo aser lai Honibarnü osangbenertem den sensaksemba mapang ashiba agi, ita aika mezüngmeshia aruba sülen iba ya ataloka liasü.

Bornali-i iba olen lemsatepba sülen TDA kikümtong nung ochi obendanga khanga nisung noklang aika adenshir longkak

aita liasü.

Iba inyakyim ya pusema local dokan tem aika shibang aser iba ajanga shishilembaba dak inyakyim nung kongshia liasü. Deobarnü tashi nung aija alisang yagi kecha telangzüba magütsü liasü.

Osangbenertem den sensaksemba mapang Bornali-i ashiba agi "ni ajeb tenzükra sülen tanga dokan kiburtemi angashitsü taji ni ajeb anenang ta pai ashi." Laisa, la iba dokan nung mapa inyak tenzükra mapang nungi kanga mezüngmeshia aruogo, ta ashi.

Iba osang ya shishilembadaker aser iba temeket nung aliba tesemtemi kanga kara prokshia

ao aser nüburtem tali adenshia liasü. Longkak aiteritem rongnung lokti tentet balala lenirtem densema liasü aser parnoki dokan kibur nem la dang tatok meshidaksütsü aser takaratiba nung jenjang agitsü khanga liasü.

Ken o dak sendakba nung Tinsukia Unnayan Pradhikaran tir Kajal Gohain-i, local dokan kibur aser lokti tentettem sensak asemstü atema senden ka ayongzükgogo. Iba senden ya Hombarnü 3 ako nungi tenzüka TDA Cultural Prakalp nung amentsü.

Ken o dak sendakba nung local police-i kecha telangzüba agüja mali.

Rara tembangtsü merangba Russia-i benjatsür: Zelenskyy

Kyiv, Luroi/August 17 (Agencies): Russia-i ceasefire alitsü memulungba ajanga rara tembangtsü merangba benjatsür, ta Ukraine Tir Volodymyr Zelenskyy-i ashi.

"Ceasefire asoshi aiben jembiba Russia-i thija aruba asenoki angur aser parnoki nisung tepsetba kodang anentsüar ano meshiteter. Iba yagi tensa tali tebenja kumdaktsür," ta Ukraine tiri sangdong ka nung ashi.

Hombarnü Zelenskyy ya Washington DC-i aotsü, kong US Tir Donald Trump-i Ukraine lenir dang yimjung tezüngzüktep ka agizüktsü asoshi ajungshitsü ta shia lir.

Russia Tir Vladimir Putin den senden amenba sülen Trump-i Ukraine nung ceasefire alemyir teti asoshi yimjung tezüngzüktep ka indang-indanga agitepner ta ashir.

Pa tangatetba khenyongi melenshia, US tiri Hokulbarnü senden amenba sülen pa indang Truth Social nung, iba tetsübotsü rara tembangtsü asoshi ibai lenmang tajungtiba lir, kechiaser

ceasefire yabo aiben mapa kuma meinyakteter, ta zülua liasü.

Senden amenba sülen Trump den phone ajanga jembidang Zelenskyy-i teti asoshi shidakba yimjung aginer aser mi remseptsüla aser nisung tepsetba anentsüla, ta shia liasü.

Iba sülen pai Ukraine taginüba lemsatepdang, security guarantee tejangja densema shidakba tamang katettsüsa yimjung nüngdaker aser Moscow-i rakzüka aliba tesemtem nungi pua bener aoba tanurtem chioktsüla, ta pai ashi.

Hokulbarnü senden mamendang Trump-i tekeraba nung ceasefire aginer ta ashi aser tezüngzüktep ka meyanglura Russia nem rongsenketzüng tsütsü temerenshi tulu agütsütsü amokmerena liasü.

Ukraine-i tekeraba nung ceasefire alitsü aser iba sülen teti asoshi tangatetep kati arutsü atema jembishinü tenzükner, aser Trump-i European lenirtem dang iba senden asoshi pa indang nükjidong ya ceasefire

deal ka yanglutsü lir ta jelia shia liasü.

Iba senden nung Putin-i Trump nem yimjung asoshi 'offer' ka agütsü ta ashir, kong Ukraine ya Donbas nung Donetsk region nungi ainshitsü aser iba melen Zaporizhzhia aser Kherson nung aliba front lines nungi Russia sepaitem meyipa aotsü.

Russia-i Donbas ya par litsü ta kibur akumer, aser yangji Luhansk tuluba aser Donetsk shilem 70 shi par kübok lir. Parnoki 2014 küm özüng alema Crimean peninsula rakzük aser küm ti lir tashi ajak amshia Ukraine amak tenzük.

Trump, shibai taoba mapang yimjung tezüngzüktep nung litsü-lika kar melenteptsüsa akumtsü ta shia lir, pai Putin den senden amenba sülen Zelenskyy den jembidang Putin indang 'offer' ya lemsatep ta ashir.

Anogo ishika tejakdang Ukraine tiri Donbas magütsütsü shia lir, kong Luhansk aser Donetsk region keta lir aser iba tesem ya amshia tarutsü nung Russia-i amaktsü ta pai ashir.

Gaza nung pua alir chioktsü aser ceasefire khanga Israel nung longkak aiter

Jerusalem, Luroi/August 17 (Agencies): Israel nung longkak aiter temi pua alir chioktsü akhangba tali ulushia Deobarnü 'one-day nationwide strike' ayongzüka lenmang tem mokdang aser businesses shibanga police temi water cannons amshi aser nisung aika apu.

Hamas teloki video tem sayar hopta ishika lir ano Israel-i asendenshir Gaza Strip amaktsü sentong tasen sangdongba sülen "Day of stoppage" ya pua aliba kinunger aser mangyimer kibong tem tenüng nung telok anati ayongzük.

Longkak aiter temi "Hostages tem tasü mang agi asenoki rara ka makoker," ta ayimtena liasü.

Gaza nung hostages 50 shi anünga lir südi aser parnok rongnung takum 20 shi lir südi ta amanger aser maneni raraba ajanga parnok takum lendongi yoker ta tsübor.

Longkak aiter temi yimten yimsüsürtem kima, military headquarters aser tongtipang highways tem densema Israel linük tesem balala nung adenshia lenmang tem mokdanga mi apu aser sepaitemi parnok dak watr cannons amshia tzü khaloktsü. Longkak aiter bhukuma restaurants aser theaters kar shibang.

Linük tesem ajunga nung longkaka aitba nung shilem ka ama police temi nisung 32 puogo ta ashir - koba taoba küm September ita Gaza nung hostages trok tasü mang anguba mechi nüburtemi ola adokba rongnung tesashitiba alitsü.

"Mitkar inyakyim ajanga pua

alirtem bener marutsü saka parnok ang tepsettsü. Tezüngzüktep ka ajanga dang parnok bener shilangtsü aser danga lenmang kecha mali," ta taoba mapang pua aliba chioker rongnungi Arbel Yehoud-i Tel Aviv indang hostage square nung longkak aitdak ashi.

"Pua alirtem aser sepaitem takum kumzüka bener arutsü asoshi tanü asenoki ajak anener. Nisung takum ka tematiba jenjang bilemteta tanü asenoki ajak anener," ta hostage Matan Angrest tetsü Anat Angrest-i ashi.

Longkak aiter temi highway lemjem tem nung ribbons sentsü tenenya lema agütsü, koba pua alirtem temaitsü, ta Hostages and Missing Families Forum ajanga ashi.

Deobarnü longkak aitba nung Israel indang labor union tulutiba Histadrut shilem magi, ajisüaka Israel nung iba ama longkak aitba aiben majangshidang. Businesses aser municipalities aikati pei mulungba nung longkak aittsü telemtetba agi.

Ajisüaka rara tembangtsü teimla kangabo mangur. Ato Kilonser Benjamin Netanyahu-i pua alirtem tangsa chiokang ta akhanger saka kasa mapang mitkar tashi amshir aser par coalition nunga sorkar anema nokdaktsü amai ajiteter.

Par cabinet nung far-right züngsem temi Hamas-i maneni yimsü asütsüsa tezüngzüktep kecha magizüktsü ta ashir. Taoba mapang pua alirtem chioktsü asoshi Israel-i ceasefire ka yangluba mapang parnoki Netanyahu sorkar

laodaktsütsü amokmerena liasü.

Deobarnü Finance Minister Bezalel Smotrich-i longkak aitba ya Hamas asoshi tajung, pua alirtem longpok nung rema yutsür aser Israel par tsükchir nem bendanga agütsüdaktsütsü meranger aser security aser tarutsü tia raksatsür ta ashi.

National Security Minister Itamar Ben-Gvir-i sangdong ka nung longkak aiter temi Israel tashi mait kumdaktsütsü meranger ta aitsü. Smotrich ama paia longkak aitba ajanga Hasam tashi itshir aser pua alirtem meyia anir arutsüba nung menudaktsür ta ashi.

Kasa mapang Gaza nung mozüki aser tenük kuli alirtemi ashiba agi, Deobarnü Israel sepaitemi teyari bushir nisung 17 shi tepsetogo aser item rongnung nisung toku Morag corridor anasa aid trucks ataa liasü.

Hamza Asfour-i ashiba agi, pa corridor north tsütsü convoy ataa aliba mapang Israel nunger snipers temi akha, mezüng nisung adenshia aliba senshitsu asoshi khaloktsü aser iba sülen meters noklang ishika pilar tanks tem nungi akha.

Chiyongtsü aser danga teyari osot lema agütsüba tesem ketdangsuba Gaza Humanitarian Foundation-ibo Deobarnü parnok tesen nung mesüra anasa injang khaloktsüba mali ta ashir.

Hamas-i anir 2023 nung Israel arütsü alema oa amakba mapang nisung 1,200 shi tepset aser 250 pua bener ao. Iba tayang kepzüka Israel-i Gaza amakba nung nisung 61,897 tepsetogo ta Hamas meyong Health Ministry ajanga ashir.

PELABA LEMSATEPER



"Kechiyong yangi asenok tatem makai alidak yimti maka, saka asenok tarutsu yimti bushir". Ibri 13:14

Onoki teti meima aliba Tsürabur asür **K. Meyikazüing Jamir** (Mongsemyimti), Pa asüba anogo nungi Lepkomong tashi onok shisa bulua alidang yimtsüryimertem, tembartem, lokdi palala talang aser ana nungi shirnokisa özü dang aria meima nübo, rongsen, shisatsü aser sarasadem agi yaritepogo, nenok ajak dang kanga pelaba lemsateper.

Özüi tsüngdong arua nenok den majuruteptetaka asen teyanglur Tsüngremi nenok taküm aser kibongtem maneni moajang ta sarasademtsür.

Temeim Kinüngtsü, Chirnur, Semchir, aser Kinüngertem.

Tsüngremi ni Pakistan kumzüka ayutsü yanglu: Asim Munir



Islamabad, Luroi/August 17 (Agencies): Pakistan indang tir aser ato kilonser melentsü aser Pakistan Tir Asif Ali Zardari ya Army Chief Asim Munir-i melentsü akok ta olulu ka adokba sülen pai yamaji masütsü ta shiogo.

Asif Ali Zardari ya yakta tir menden nungi alutsü aser army tekolakbai linük tir mapa inyaktsü asoshi lenmang lapoktsütsü akok ta kanga jembitepa liasü. Iba sülen Field Marshal tasenbai ita ka tsüngta United States anaben semdang aser iba mapang Ato Kilonser Shehbaz Sharif alemyir US lenirtem den senden mena liasü.

US semdang meyipa shildang dang Belgium nung anenzükdang Munir-i Pakistan tir aser ato kilonser melentsü olulu adoka jembiba ya tiazü ta osangbener dang ashi.

Pakistan nung tang parliamentary system ya presidential form of government agi melentsü meranger ta osang kar ajanga ashir. Tir Zardari-i pa menden yutsütsü mechi sorkar tasenba nung par jabaso Bilawal Bhutto ya dendaktsütsüla ta ashiba osanga karbo lir.

Pakistan nung Asim Munir ya tashi tulu aliba nübu ka lir, kong mitkar temi tashiyim amshia sorkar atsüngdokba mapang shia ajurur.

Pai DG ISI, DG Military Intelligence, Corps Commander ama tongtipang mapa inyaka arur tang Army Chief mapa bena lir. Tawa ang pa Field Marshal jenjangi ajungket, koba

Pakistan nungbo tanaben ang lir. Ayuba Khan ya Field Marshal akum aser iba sülen dictator-president kuma liasü.

Ajisüaka pa indang yimten yimsüsüba mangdang asüngdang dang, "Tsüngremi ni linük kumzüka ayur ka asütsü yanglu. Ni iba dak alaka danga position kecha maginer," ta Munir-i langzü.

Ato kilonser aser pai ghonda 18 tashi mapa inyakba pai tenüng asang aser shidakba nung tatok meshitsü asünungbo "political reconciliation" dang akoktsü, ta ashi, koba tepuokdak yua alisang taoba ato kilonser Imran Khan aser par Pakistan Tehreek-e-Insaf (PTI) party indang ashiba lir.

Munir-i United States aser China tsüngta tesendaktep junga yutettsü temulung lemtetba ashi aser US Tir Donald Trump-i tejangja nung yimjung asoshi inyaker ta ashi saka Pakistan-i tembar ka mechi tembar ka mesamatsü ta ashi.

Pahalgam amakba tayang kepzüka India-i kiralongrar indang ki o jen amakdang US Secretary of State Marco Rubio-i PM Sharif dang masü Munir dang ang atsüanem akatsü ashi.

Pahalgam kiralongrar lendong nung ya Munir tasa lir ta India-i repranger, kong tourists 26 khaset. Munir ya two-nation theory bhukumer ka lir aser aiben Kashmir ya Pakistan indang "jugular vein" ta züngshir aser Hindu aser Muslim sadanger alitsüba indang jembir.

India coach Khalid-i Nations Cup atema asayartem sangdongogo



Luroi/August 17, 2025 (Agencies): India tebur football team head coach ama Khalid Jamil-i taruba CAFA Nations Cup 2025 atema team shimtsü asoshi asayar 35 shimdangba sangdongogo.

Team ya August 16 nü nungi Bengaluru nung preparatory camp tenzüokogo, saka tang tashi nung asayar 22 dang tonga lir. Tanungba asayar 13 ya pei club nungi Durand Cup asayadar aser parnoka mapang tatsüka lir team nung adentsü.

Iba camp ya Jamil asoshi coach mapa tenzüokba mezüngbuba mapa lir, aser India team CAFA Nations Cup Group B nung team tajungtem

den atar aliba mapang ka nung pa lenisüba nung India team mezüngbuba asayatsü lir. India team Hisor, Tajikistan-i aotsü, kong parnok August 29 nü Tajikistan den, September 1 nü Iran den aser September 4 nü Afghanistan den asayatsü. Tasembuba jenjang asoshi aser final asaya ya September 8 nü Hisor aser Tashkent, Uzbekistan nung asayatsü.

Iba asayamung atema shimba asaya 35 rongnung captain Sunil Chhetri densema mali. Team tashi taitka ka yoktsü atema All India Football Federation (AIFF)-i club ajak dang pei asayartem chiochtsü mepeshia metetdaksüogo. Iba

asayamung ya AFC Asian Cup 2027 Qualifiers atema-a renemshiba asayamung ka asütsü.

Camp tonger aliba asayartem:

Goalkeepers: Amrinder Singh, Gurpreet Singh Sandhu, Hrithik Tiwari

Defenders: Akash Mishra, Alex Saji, Boris Singh Thangjam, Chinglensana Singh Konsham, Hmingthanmawia Ralte, Rahul Bheke, Roshan Singh Naorem, Sandesh Jhingan, Sunil Benchamin

Midfielders: Ashique Kuruniyan, Danish Farooq Bhat, Nikhil Prabhu, Rahul Kannoly Praveen, Suresh Singh Wangjam, Udanta Singh Kumam

Forwards: Irfan Yadwad, Lallianzuala Chhangte, Rahim Ali, Vikram Partap Singh

Camp nung adentsü aliba asayartem:

Mohun Bagan SG: Anirudh Thapa, Deepak Tangri, Lalengmawia Ralte, Liston Colaco, Manvir Singh, Sahal Abdul Samad, Vishal Kaith

East Bengal FC: Anwar Ali, Jeakson Singh, Naorem Mahesh Singh

Jamshedpur FC: Manvir Singh, Albino Gomes

NorthEast United FC: Jithin MS.

SAFF U-17 Championship August 20 nungi asayatsü

Luroi/August 17, 2025 (Agencies): India U-17 women's team head coach Joakim Alexandersson-i SAFF U-17 Championship atema asayar 23 tenüing sangdongogo. Iba asayamung ya Thimphu, Bhutan nung August 20 nungi 31 tashi asayatsü.

Alexandersson lenisüba nung India U-17 tetsür team SAFF Championship nung asayatsü, koba October ita Kyrgyz Republic nung asayatsü aliba AFC U-17 Women's Asian Cup Qualifiers atema renemshiba asayamung ka asütsü.

Alexandersson, shiba lenisüba nung India U-20 team küm metsü tsüingda tang mezüngbuba U-20 Women's Asian Cup atema qualify süogo, paisa iba team ya takok dangi anitsü imlar.

SAFF U-17 Women's Championship nung India, Bhutan, Nepal, aser Bangladesh ta double round-robin league format nung asayatsü aser iba ajanga asayartem nem asaya timba nung shilem agitsü atema maongka agütsütsü.

Team shia asaya trok asayatsü aser team kobai point

timtiba ngudir iba team yagi asayamung akoktsü. Asaya ajak Changlimithang Stadium nung asayatsü.

India squad:

Goalkeepers: Munni, Surajmuni Kumari, Tamphasana Devi Konjengbam.

Defenders: Alena Devi Sarangthem, Alisha Lyngdoh, Binita Horo, Divyani Linda, Elizabeth Lakra, Priya, Ritu Badaik, Taniya Devi Tonambam.

Midfielders: Abhista Basnett, Anita Dungdung, Beena Kumari, Bonifilia Shullai, Julian Nongmaithem, Pritika Barman, Shveta Rani, Thandamoni Baskey.

Forwards: Anushka Kumari, Nira Chanu Longjam, Pearl Fernandes, Valaina Jada Fernandes.

India team asaya mapanglem:
August 20: Nepal vs India (14:30 IST)

August 22: India vs Bangladesh (14:30 IST)

August 24: Bhutan vs India (14:30 IST)

August 27: India vs Bhutan (17:30 IST)

August 29: India vs Nepal (17:30 IST).

Cincinnati Open: Sinner aser Alcaraz na final asayatsü

Luroi/August 17, 2025 (Agencies): Defending champions aser top-ranked Jannik Sinner aser Carlos Alcaraz na Cincinnati Open tebur kija final asayatsü. Tenapronglai semifinal asaya straight-set nung koka liasü.

Sinner-i France nunger qualifier Terence Atmane 7-6 (7/4), 6-2 agi akok aser Spain nunger asayar Alcaraz-i 6-4, 6-3 agi Alexander Zverev madak takok ngua liasü.

Alcaraz aser Sinner na taküm Rome, Roland Garros, aser Wimbledon final asayaogo aser tena tatemsa taoba ita All England Club nung final asayaba Italy nunger asayar yagi koka liasü.

Sinner-i pa arishi küm 24 ajungba anogo France nunger asayar Atmane-i tamangmangtsüka kanga junga asaya tuya aliba sotogo, aser pa ya Roger Federer sülen Cincinnati asayamung aneben atonga akokba mezüngbuba asayar akümtsü merangdar.

Wimbledon sülen US Open atema renemshiba mapang Sinner tang mezüngbuba asayamung ka nung asayar, aser pai iba asayamung nung tang tashi nung set ka nung

danga tamakok ngua mali.

Kasa mapang nung Alcaraz-a tang agi tanabenbuba Cincinnati nung final asayatsü lir. 2023 küm final nung pa Novak Djokovic-i tsükdakja liasü.


Asaya nung Alcaraz-i mezüngbuba set nung Zverev indang serve ka break süa set akok. Tanabuba set tasembuba game nung Zverev shiba diabetic agi tim atemer pa temang mejungi kuma medical timeout ka agia liasü. Iba sülen Zverev meyipa arur asaya saka junga masayateti Alcaraz nem asaya kokdaksü.

Alcaraz-i ashiba agi, Hombarnü final asaya nung Wimbledon nung Sinner makokba mang ayangtsü yonga atar.

Sinner aser Atmane na asaya nung Sinner-i pa indang mezüngbuba service game trok nung point asem dang mongutet. Tena pronglai serve ka danga break mesüteti asayaba sülen tiebreaker asaya koka Sinner-i koka liasü.

Ajisüaka tanabuba set nungbo Sinner-i Atmane nem game ana dang kokdatsür pai asaya koka liasü.

Pakistan Asia Cup team nung Babar aser Rizwan na mali



Babar Azam

Mohammad Rizwan

Luroi/August 17, 2025 (Agencies): Pakistan-i Deobarnü Sharjah nung taruba triangular T20I series aser UAE nung Asia Cup 2025 atema asayar 17 sangdongba nung asayar tejen Babar Azam aser Mohammad Rizwan na densema mali. Iba team ya Salman Ali Agha-i anir asayatsü aser iba ajanga asayar shimertemi Saim Ayub, Sahibzada Farhan aser Fakhar Zaman nunger amala aggressive batter tem tesaklokba asüba sayur.

Babar aser Rizwan na team nung maniokba ya ayimsünga jembidar, saka director high-performance Aqib Javed-i

ashiba agi, tena madenyonga Pakistan team takok ngua aotsü akoktsü.

Team sangdongba mapang Javed-i, "iba team yagi Asia Cup nung India team akoktsü tashi lir. Nenoki aginüang taginü India aser Pakistan na asaya ya alima nung cricket asaya tulutiba lir. Asayar ajaki aji meteta lir," ta ashi.

Asia Cup nung India aser Pakistan na Group A nung külemi ata lir aser September 14 nü Dubai nung asayatsü aliba asaya ya iba team ti asayaba asayamung nung asaya tulutiba ka asütsü ta jembidar. Yimden yimsüsüba tsütsü mangatettep aliba ajanga India nung telok kari

iba asaya masayatsü asoshi ayongzüokaka tang tashi nung kecha athitsü sentong mali.

Babar Azam team nung mezüngoksemba indang jembiba mapang Head coach Mike Hesson-i, pa dang T20 asaya nung pa asayaba yimya arangtetsütsü atema shiogo, ta metetdaksü. Paisa, Babar taruba Big Bash League nung Adelaide Strikers nungi asayatsü lir, anungji iba asayamung ya pa atema T20 asayar ka ama renlokyonga aotsü asoshi kanga tongtimbang asütsü, ta ashi.

Pakistan team tasenba ya mezüngbuba triangular T20I series nung Afghanistan aser UAE (Aug. 29-Sept. 7; Sharjah) na den asayaba mapang tendangtsü aser iba sülen parnok Asia Cup (Sept. 9-28; Dubai aser Abu Dhabi) asayatsü.

Asia Cup 2025 atema Pakistan team:

Saim Ayub, Sahibzada Farhan, Fakhar Zaman, Mohammad Haris, Salman Ali Agha (captain), Hasan Nawaz, Hussain Talat, Faheem Ashraf, Khushdil Shah, Mohammad Nawaz, Mohammad Wasim, Salman Mirza, Shaheen Shah Afridi, Haris Rauf, Hasan Ali, Sufiyan Muqem, Abrar Ahmed.

BILEMDANGANG

"Shitakba ladanglarerji asen meketa aliba kiyonger."